

SAOPŠTENJE

Ured za reviziju institucija u Federaciji Bosne i Hercegovine proveo je reviziju učinka na temu: **„Unaprjeđenje kapaciteta za planiranje razvojnih projekata u kantonima u FBiH“.**

Cilj revizije bio je da procijeni da li su vlade kantona preduzele adekvatne aktivnosti, kako bi unaprijedile kapacitete za planiranje razvojnih projekata. Riječ je o projektima kojima se realizuju strategije razvoja u oblastima značajnim za kvalitet života građana, kao što su vodosnabdijevanje, industrija, građevinarstvo, transport, zdravstvo, socijalna infrastruktura i dr.

Nedovoljan broj kvalitetnih projekata ima za posljedicu i nedovoljnu realizaciju razvojnih planova zbog čega brojni društveni problemi ostaju neriješeni. Kvalitetno pripremljeni projekti povećavaju mogućnost za osiguranje povoljnih finansijskih sredstva za njihovu realizaciju i privlačenje potencijalnih investitora. Unaprjeđenjem kapaciteta za planiranje projekata osigurala bi se priprema većeg broja razvojnih projekata kojima se strateška opredjeljenja pretvaraju u konkretne aktivnosti.

Ispitivanje je fokusirano na vremenski period od 2012. do 2015. godine. Međutim, određeni podaci odnose se na i aktivnosti koje su institucije preduzimale i ranije, obzirom da je propis koji djelimično tretira navedenu oblast prvobitno donesen 2003. godine.

Provedena revizija je pokazala da vlade kantona nisu bile efikasne u preduzimanju aktivnosti kojima su trebale unaprijediti kapacitete za planiranje projekata. Identifikovani su značajni problemi koji se tiču sposobnosti institucija da uspješno planiraju i izrađuju projekte. U većini kantona izostale su aktivnosti usmjerene na uspostavu funkcije upravljanja razvojnim projektima. Isto se ogleda u nedovoljno uspostavljenim organizacijskim kapacitetima, neizgrađenom sistemu edukacije osoblja koje radi na izradi i upravljanju projektima, te nedovoljnim aktivnostima koordinacije i uključivanja predstavnika općina, gradova, civilnog društva, privrede i nevladinog sektora u izradu projekata.

Izveštaj u cjelosti možete pročitati [ovdje](#).